

廣陵通典

四之五



廣陵通典卷四

江都汪中撰

宋武帝永初元年省江左僑立之幽州冀州併徐州

青州并州兗州兗州領南高平南平昌南濟陰南

濮陽南泰山濟陽南魯東燕南東平高密南齊南平

原濟岷鴈門凡十四郡廣陵海陵山陽三郡皆屬徐

州廣陵郡領廣陵海陵高郵江都興五縣又併領江

左僑立幽州遼西郡之肥如潞真定新市四縣四縣

尋省而廣陵故時所領海西射陽凌淮浦淮陰五縣

別屬徐州之臨淮郡二年故左衛將軍劉粹督江北

淮南郡事征虜將軍廣陵太守三年遷豫州刺史三月護軍丹陽尹檀道濟監南徐兗之江北淮南諸郡軍事鎮北將軍南兗州刺史鈞廣陵土甚平曠刺史每以秋月多出海陵觀濤與京口對岸江之壯濶處也少帝景平元年魏師圍青州刺史竺夔於東陽城夔告急詔加道濟使持節監征討諸軍事與王仲德救東陽未至魏燒營焚攻具去還廣陵二年東莞劉秀之爲廣陵郡丞司空徐羨之等將廢廬陵王義真以告道濟道濟屢陳不可不見納羨之等將廢帝諷道濟入朝既至以謀告之帝既廢道濟入守朝堂文

帝元嘉元年八月癸卯道濟進號征北將軍加散騎常侍給鼓吹一部進封武陵郡公食邑四千戶固辭進封又增督青州徐州之淮陽下邳琅邪東莞元缺五郡諸軍事還廣陵羨之與傅亮謝晦謀爲自全計以晦據荊州道濟鎮廣陵各擁強兵以制朝廷羨之亮於中秉權可得持久及帝將正諸人罪王華之徒咸云道濟不可信帝曰道濟止於脅從本非事主殺害之事又所不關吾召而問之必異於是召道濟入朝三年正月乙丑道濟至建康丙寅誅司徒徐羨之等授道濟以衆使西討晦平之五月乙未以道濟爲

廣四  
征南大將軍遷江州刺史戊戌以後將軍長沙王義  
欣爲南兖州刺史乙巳分遣大使巡行四方負外散  
騎常侍范雝司徒主簿龐遵使南兖州四年八月太  
傅長沙景王神主隨子義欣之鎮備所加殊禮下舩  
至廣陵入行廟七年右將軍到彥之北伐率大衆入  
河義欣進彭城爲衆軍聲援以游擊將軍胡藩戍廣  
陵行府州事彥之退敗青齊搔擾將佐慮寇大至勸  
委鎮還都義欣堅志不動十二月辛酉遷豫州刺史  
八年二月以太子右衛率宗室劉遵考督南徐兖州  
之江北淮南諸軍事征虜將軍南兖州刺史領廣陵

太守尋徵爲侍中領後軍將軍六月己卯割江南及  
揚州晉陵郡屬南徐州江北屬南兖州以徐州刺史  
竟陵王義宣都督南兖州刺史當鎮山陽未行八月  
丁未割豫州秦郡屬南兖州九年六月壬寅以撫軍  
將軍荊州刺史江夏王義恭爲都督南兖徐兖青冀  
幽六州豫州之梁郡諸軍事征北將軍開府儀同三  
司南兖州刺史鎮廣陵十二年四月丙辰詔內外百  
官舉才義恭上表曰竊見南陽宗炳操履閒遠思業  
真純砥節邱園息賓盛世貧約而苦內無改情軒冕  
屢招確爾不拔若以蒲帛之聘感以大倫之美庶投

竿釋褐翻然來儀必能毗燮九官宣贊百揆尚書金部郎臣徐森之臣府中直兵參軍事臣王天寶並局力允濟忠諒款誠往年逆臣叛逸華陽失守森之全境寧民績章危棘前者經略伊瀍元戎喪旅天寶北勤河朔東據營邱勲勇既昭心事兼竭雖蒙褒敘未盡才宜並可授以邊藩展其志力交趾遼邈屢喪藩將政刑每闕撫莅維艱南中負遠風謠迴隔蠻獠狡竊邊氓塗炭實須練實以綏其難謂森之可交州刺史天寶可寧州刺史庶足威懷荒表肅清遐服十三年省輿縣入江都十七年六月太子劭詣京口拜京

陵義恭自江都會之十月戊申徵爲司徒錄尚書事戊寅衛將軍臨川王義慶爲都督南兗徐兗青冀幽六州諸軍事南兗州刺史尋加開府儀同三司南兗州舊領東燕郡江左分濮陽所立也領燕白馬平昌考城四縣十八年省考城併燕又省東燕郡爲縣屬南濮陽後又省東燕縣南東平郡領范蛇邱歷城三縣高密郡領淳于黔陬營陵夷安四縣南齊郡領安西臨菑二縣南平原郡領平原高唐茌平三縣濟岷郡領營城晉寧二縣鴈門郡領樓煩陰館廣武崞馬邑五縣凡七郡二十三縣並省屬南徐州二十年四

廣四  
月甲午立第六皇子誕爲廣陵王食邑二千戶時年  
十一義慶在廣陵有疾求還許解州還朝二十一年  
正月辛酉以太子詹事宗室劉義宗爲散騎常侍征  
虜將軍南兖州刺史尋卒二月甲午廣陵王誕監南  
兖州諸軍事北中郎將南兖州刺史鎮廣陵七月乙  
巳詔南兖諸州悉督種麥以助缺乏八月戊辰誕徙  
南徐州刺史以征西大將軍荊州刺史衡陽王義季  
爲都督南兖徐兖青冀幽六州諸軍事征北大將軍  
開府儀同三司南兖州刺史二十二年七月乙酉義  
季徙徐州刺史二十三年二月癸卯左衛將軍宗室

劉義賓爲南兖州刺史二十四年八月癸卯義賓徙  
徐州刺史九月辛未中書令領太子詹事徐湛之爲  
前將軍南兖州刺史湛之善於爲政威惠並行廣陵  
城舊有高樓湛之更加修整南望鍾山城北有陂澤  
水物豐盛湛之更起風亭月觀吹臺琴室果竹繁茂  
花藥成行招集文士盡游玩之適一時之盛也二十  
六年湛之入爲丹陽尹冬十月以廣陵彫敝改封廣  
陵王誕隨郡王甲辰以中軍將軍揚州刺史始興王  
濬爲使持節都督南徐兖二州諸軍事征北將軍開  
府儀同三司南徐兖二州刺史二十七年七月庚午

下詔北討以兵力不足悉發南兗等六州三五民丁  
倩使暫行符到十日束裝緣江五郡集廣陵緣淮三  
郡集盱眙有司又奏軍用不充南兗等四州富民家  
貲四分借一事息即還十二月丙辰朔魏主燾自彭  
城引兵南下使中書郎魯秀出廣陵高涼王那出山  
陽永昌王仁出橫江凡所經過莫不殘害己未燾於  
盱眙渡淮乙丑破穴從僕射胡崇之等軍畱尚書韓  
元興數千人守盱眙自率大衆南向帝遣人逆燒廣  
陵城府舩乘使廣陵南沛二郡太守劉懷之率人民  
渡江庚午燾至瓜步壞民屋宇及伐蒹葦於滁口造

箄筏聲欲渡江內外戒嚴帝募人齎冶葛酒置空村  
中欲以毒魏人竟不能傷燾鑿瓜步山爲盤道於其  
頂設氈屋燾不飲河南水以駱駝負河北水自隨一  
駱駝負三十斗遣使餉帝駱駝名馬求和請婚帝遣  
奉朝請田竒餉以珍羞異味燾得黃甘即噉之并大  
進酈酒左右有耳語者疑食中有毒燾不荅以手指  
天而以其孫濬示竒曰至此非唯欲爲功名實是貪  
結姻援若能酬酢自今不復相犯使其散騎侍郎夏  
侯野來通問二十八年正月丙戌朔燾大會羣臣於  
瓜步山上班賞各有差文武受爵者二百餘人丁亥

掠民戶燒邑屋而去或曰燾略江都馮氏女與其孫  
濬爲妾後冒稱信都馮朗女所謂文明太后者也燾  
以海陵多陂澤不敢往還攻盱眙不克二月丙辰朔  
退走自彭城北過時江夏王義恭鎮彭城震懼不敢  
追躡民或告虜所驅廣陵民萬餘口夕應宿安王陂  
去城數十里今追之可悉得諸將並請義恭不許經  
宿帝遣驛至使悉力急追義恭乃遣鎮軍司馬檀和  
之向蕭城燾軍先已聞知乃盡殺所驅廣陵民輕騎  
引去帝遣南徐兖二州刺史始興王濬率衆城瓜步  
山二月癸酉詔曰獫狁孔熾難及數州凶羯瘡挫洗

跡遠奔彫傷之民宜時振理凡遭寇賊郡縣令還復  
居業封屍掩骼賑贍饑流東作方始務盡勸課貸給  
之宜事從優厚其流寓江淮者並聽即屬并蠲復稅  
調壬午車駕幸瓜步三月壬辰始興王濬解南兖州  
戊申徐州刺史武陵王駿爲南兖州刺史五月己巳  
驃騎將軍江夏王義恭領南兖州刺史增督南兖豫  
徐兖青冀司雍秦幽并十一州諸軍事并前揚南徐  
十三州移鎮盱眙陳畱阮韜爲州別駕義恭嘗逆求  
資費錢韜曰此朝廷物執不與十一月壬辰曲赦兖  
南兖徐豫青冀六州使太尉中兵參軍沈慶之自彭



城徙流民數千家於瓜步二十九年正月甲午詔曰  
經寇六州居業未能仍值災澇饑困荐臻可速符諸  
鎮優量救卹今農事行興務盡地利若須田種隨宜  
給之十二月南兖州刺史江夏王義恭遭大妃憂改  
授大將軍南徐州刺史還鎮東府三十年正月以南  
兖州并南徐州四月己巳孝武帝即位六月庚午還  
分南徐州立南兖州閏月壬申領軍將軍散騎常侍  
沈慶之爲使持節都督南兖豫徐兗四州諸軍事鎮  
軍將軍南兖州刺史鎮盱眙尋封慶之南昌縣公食  
邑三千戶自盱眙還鎮廣陵孝建元年正月豫州刺

史魯爽等反帝徵慶之入朝遣討爽大破之於歷陽  
之小峴臨陳斬爽進慶之號鎮北大將軍加督青冀  
幽三州改封始興縣公戶邑如故慶之以年滿七十  
固請辭事二年二月丙寅遷侍中左光祿大夫開府  
儀同三司辛巳尚書右僕射劉延孫爲南兖州刺史  
加散騎常侍七月癸巳第十四皇弟休茂封海陵王  
食邑二千戶八月辛酉南兖州刺史劉延孫遷雍州  
刺史甲申右衛將軍檀和之爲南兖州刺史三年三  
月癸丑皇子西陽王子尚都督南徐兖二州諸軍事  
北中郎將南兖州刺史以輔國將軍袁粲爲長史廣

陵太守行府州事七月丙子子尚遷揚州刺史祕書  
監領步兵校尉建安王休仁都督南兖徐二州諸軍  
事冠軍將軍南兖州刺史袁粲爲冠軍車長史將軍太  
守如故大明元年休仁遷侍中八月甲辰司空南徐  
州刺史竟陵王誕爲都督南兖南徐青冀幽六州  
諸軍事南兖州刺史始誕爲會郡刺史值帝入討太  
子劭誕出頓西陵遣參軍劉季之破劭將華欽庾導  
於奔牛及南譙王義宣反帝欲奉乘輿法物以迎義  
宣誕固執不可然後處分上流平定誕有殊勲帝性  
多猜頗相疑憚而誕造立第舍窮極工巧園池之美

冠於一時多聚才力之士實之第內精甲利器莫非  
上品帝意愈不平旣出鎮京口猶以去都密邇復徙  
廣陵而使太子詹事劉延孫爲鎮軍將軍南徐州刺  
史先是高祖遺詔以京口要地非宗室近戚不得居  
之延孫於帝室本非同宗帝以廣陵與京口對岸欲  
使腹心據京口以防誕故以授延孫而與之合族使  
諸王序親二年四月甲午海陵王休茂進號左將軍  
增邑千戶竟陵王誕發民築廣陵城誕旣見猜潛爲  
之備因魏寇邊修治城隍聚糧治仗嫌隙旣著道路  
常云誕反司空從事中郎江智淵懼禍及請假歸建

康三年建康民陳文紹上書曰私門有幸亡大姑元  
嘉中蒙入臺六宮薄命早亡先朝賜贈美人又聽大  
姑二女出入問訊父饒司空誕取爲府史恒使入山  
圖畫道路勤劇備至不敢有辭不復聽歸消息斷絕  
姑二女去年冒啟歸訴蒙陛下聖恩賜敕解饒吏名  
誕見符至大怒喚饒入交問汝欲死邪訴臺求解饒  
即荅官比不聽通家信消息斷絕若是姊爲啟聞所  
不知誕因問饒汝那得入臺饒被問依實啟荅旣出  
誕主衣莊慶畫師王強語饒汝今年敗汝姊誤汝官  
云小人輩敢持臺家逼我饒因叛走歸誕即遣王強

將數人逐突入家內縛錄將還廣陵至京口客舍乃  
侈死井中託云饒懼罪自殺抱痛懷冤冒死歸訴吳  
郡民劉成又詣闕上書告誕謀反稱息道龍昔伏事  
誕親見姦狀又見誕在石頭城內修乘輿法物習唱  
警蹕道龍私獨憂懼向伴侶言之語頗漏泄誕使大  
吏令監內執道龍道龍逸走誕怒鞭殺監又捕殺道  
龍又豫章民陳談之上書訴枉稱弟詠之昔蒙誕采  
錄隨從歷鎮大駕南下爲誕奉送牋書經涉危險時  
得上聞聖明登阼恩澤周溥回改小人使命微勤賜  
署臺位詠之恒見誕與左右小人莊慶傅元祀潛圖

姦逆言詞醜悖每云天下方是我家有汝等不憂不  
富貴又常䟽陛下年紀姓諱往巫鄭師憐家祝詛詠  
之既聞此語又不見其事恐一旦事發橫罹其罪密  
以告建康右尉黃宣達并有啟聞希以自免元祀弟  
知詠之與宣達來往自嫌言語漏泄即具以告誕誕  
大怒令左右飲詠之酒逼使大醉因言詠之乘酒罵  
詈遂被害自顧冤枉事有可哀其年四月帝使有司  
奏曰臣聞神極尊明大儀所以貞觀皇天峻邈元化  
所以幽宣故能經緯眊俗大庇黔首庶道被八紘不  
遺䟽賤之賞威格天區豈漏親貴之罰此不刊之鴻

則古今之恒訓謹按元嘉之末天綱崩禡人神哀憤  
含生喪氣司空竟陵王誕義兼臣子任居藩維進不  
能泣血提戈忘身徇節退不能閉關拒險焚符斬使  
遂至拜受僞爵欣承榮寵沈淪姦逆肆於昏放以妻  
故司空臣湛之女誅亡餘類單舟遄遣披猖千里事  
哀行路賊忍無親莫此爲甚故山陰令傅僧祐誠亮  
國朝義均休戚重門峻衛不能拒折簡之使巖險千  
里不能庇匹夫之身乃更助虐馮凶抽兵勒刃遂使  
頓仆牢阱死不旋踵妻子播流庭筵莫立見之者流  
涕聞之者含歎及神鋒首路攬槍東指風卷四嶽電

掃三江誕猶持疑兩端陰規進退陛下頻遣書檄告  
譬殷勤方改姦圖未乃奉順分遣弱旅永塞符文宴  
安所莅身不越境悖禮忘情不顧物議彎弧躍馬務  
是畋遊致奔牛有崩碎之陣新亭無獨克之術假威  
義銳乞命皇旅竟有何勞而論功伐既稊稷廓清大  
明升曜幽顯宅心遠邇雲集誕忽星行之悲違開泰  
之慶遲回顧望淹踰旬朔逆黨陳叔兒等泉寶鉅億  
資貨不貲誕收籍所得不歸天府辭稱賞軍實入私  
室又太官東傳舊有獻御喪亂既平猶加斷遏珍羞  
庶品回充私膳於號諱之辰遽甘滋之品當維新之

始絕苞苴之貢忠孝兩忘敬愛俱盡乃徵引巫史潛  
考圖緯自謂體應符相富貴可期悖意醜言不可勝  
載遂復遙諷朝廷占求官爵侮蔑宗室詆毀公卿不  
義不昵人道將盡荷任神州方懷姦慝每闕向宸御  
妄生規幸多樹淫祀顯肆稊詛遂在石頭潛修法物  
傳警稱蹕擬則天行皆已駭暴觀聽彰布朝野昔內  
難甫寧珍瑋散佚有御刀利刃擅價諸夏天府禁器  
歷代所珍誕密加購賞頓藏私室賊義宣初平餘黨  
逃命誕舍縱罔忌私竊招納名工細巧悉匿私第又  
引義宣故將裘興爲己腹心事旣彰露猶執欺罔公

文面啟矯稱舊隸加以營宇制館僭擬天居引石徵材專擅興發驅迫士族役同輿阜殫土木之姿窮吞并之勢故會稽宣長公主受遇二祖禮級尊崇臣湛之亡身徇國追榮典軍誕以廣拓宅宇地妨藝植輒逼遺孤頓相驅徙遂令神主宵遷改卜委巷宗戚含傷行路掩涕又緣谿兩道積代通衢誕拓宇開垣擅斷其一致使徑塗擁隔川陸阻礙神怒民怨毒徧幽顯故丞相臨川烈武王臣道規名德茂親勲光常策異禮殊榮受自先旨嗣王臣義慶受任西夏靈寢暫移先帝親枉鑾輿拜辭路左恩冠終古事絕常班誕

又以廟居宅前固請毀換詔旨不許怨懟彌深有覲面目豺狼爲性規牧江都希廣兵力天德尚宏甫申所請仍謂應住東府宜爲中台貪冒無厭人莫與比雖聖慈全宥每垂容納而虐戾不悛姦詖彌甚受命還鎮猜怨愈深忠規正諫必加鴆毒諂瀆膚躁是與比周又矯稱符敕設榜開幕事發辭寢委罪自下及錄事徐靈壽以常署受坐將就囚執旨韓近恭中護軍遣吏夏嗣伯密相屬請求寬桎梏且王僧達臨刑之啟高闡即戮之辭皆稱潛驛往來遙相要契醜聲穢問宣著遐邇含識能言孰不憤歎又獲吳郡民劉

成豫章民陳談之建康民陳文紹等並如訴狀則姦情猜志歲月增積昔周德初升公旦有流言之釁魯道方泰季子斷達泉之誅近則淮厲覆車於前義康襲軌於後變發柴竒禍成范謝亦皆以義奪親情爲憲屈況乃上悖天經下誣政道結釁於无妄之辰希幸於文明之日皇穹所不覆厚土所不容夫無禮之誠臣子所宜服膺干紀之刑有國所宜慎守臣等參議宜下有司絕誕屬籍削爵土收付廷尉法獄治罪諸所連坐別下考論伏願遠尋宗周之重近鑒興亡之由割恩棄私俯順羣議則卜世靈根於茲克固鴻

勲盛烈永永無窮陛下如復隱忍未垂三思則覆皇基於七百擠生民於塗炭此臣等所以夙夜危懼不敢避鈇鉞之誅者也帝僞不許有司又固請乃貶爵爲侯遣令之國帝將殺誕以義興太守垣閭爲兗州刺史配以羽林禁兵遣給事中戴明寶隨閭襲誕使閭以之鎮爲名閭至廣陵誕未悟也四月甲寅明寶夜報誕典籤蔣成使明晨開門爲內應成以告府舍人許宗之宗之奔入告誕誕驚起呼左右及素所蓄養數百人執蔣成勒兵自衛將曉閭明寶率精兵卒至誕已列兵登陴自在門上斬蔣成焚兵籍赦作部

徒繫囚遣腹心率壯士擊明寶等破之殺閻明寶奔  
逃自海陵界得還帝起始興公沈慶之爲使持節都  
督南兖徐兗三州諸軍事車騎大將軍開府儀同三  
司南兖州刺史率衆討誕慶之至歐陽誕遣客慶之  
宗人沈道愍齎書說慶之餉以玉鐶刀慶之遣道愍  
反數以罪惡誕焚燒郭邑盡驅居民入城分遣書檄  
要結近遠時山陽內史梁曠家在廣陵誕執其妻子  
遣使要曠曠斬其使誕怒滅其家劉延孫馳遣中兵  
參軍杜幼文率兵赴討旣至廣陵誕已城守幼文乃  
還誕遣使要延孫延孫亦斬其使誕作表投之城外

曰往年元凶禍逆陛下入討臣背凶赴順可謂常節  
及丞相構難臧魯協從朝野恍惚咸懷憂懼陛下欲  
百官羽儀星馳推奉臣前後固執方賜允俞社稷獲  
全是誰之力陛下接遇殷勤屢加榮寵驃騎揚州旬  
月移授恩秩頻加復賜徐兗仰屈皇儲遠相餞送臣  
一遇之感感此何忘庶希偕老永相娛慰豈謂陛下  
信用讒言遂令無名小人來相掩襲不任枉酷即加  
誅翦雀鼠貪生仰違詔敕今親勒部曲鎮扞徐兗先  
經何福同生皇家今有何愆便成胡越陵鋒奮戈萬  
沒豈顧盪定以期冀在旦夕右軍宣簡爰及武昌皆



以無罪並遇枉酷臣有何過復致於此陛下宮帷之醜豈可三緘臨紙悲塞不知所言帝忿誕深切誕左右腹心同籍暮親在建康者並誅之死者以千數或有家人已死方自城內逃出者慶之至城下誕登樓謂之曰沈君白首之年何爲來此慶之曰朝廷以君狂愚不足勞少壯故使僕來耳誕幢主韓道元降帝慮誕北奔使慶之斷其走路慶之移營白土去城十八里夕進新亭豫州刺史宗慤徐州刺史劉道隆率衆來會慶之兄子兗州刺史僧榮鎮瑕邱遣子懷明率數百騎詣受慶之節度初誕誑其衆云宗慤助我

及慤至躍馬繞城呼曰我宗慤也城上奪氣中兵參軍柳光宗參軍何康之劉元邁幢主索智朗謀開北門降未期而康之所領隊主石貝子先衆出奔康之懼事泄夜與智朗斬關出誕禽光宗殺之爲高樓置康之母於其上暴露之不與食母呼康之數日而死誕初閉城拒使記室參軍賀弼固諫再三誕怒抽刃向之乃止或勸弼出降弼曰公舉兵向朝廷此事旣不可從荷公厚恩又義無違背惟當死明心耳乃服藥自殺別駕范義母妻子並在城內有勸義出降者義曰我人吏也且豈能作何康之活邪弼字仲輔會

稽山陰人有文才義字明休濟陽考城人早有世譽  
劉延孫復遣杜幼文率兵渡江隸慶之誕見衆軍大  
集欲棄城北走留中兵參軍申靈賜居守自將騎步  
數百人親信並隨聲云出戰邪趨海陵道誕將周豐  
生馳告慶之慶之遣龍驤將軍武念追躡誕行十餘  
里衆並不欲去請誕還城誕曰我還卿能爲我盡力  
不衆皆曰願盡力左右楊承伯牽誕馬曰死生且還  
保城欲持此安之速還尚得入不然敗矣慶之所遣  
將戴寶之單騎前至刺誕殆獲誕懼乃馳還武念去  
誕遠未及至故誕得向城旣至曰城上白須非沈公

邪左右曰申中兵誕乃入以靈賜爲驃騎府錄事參  
軍王璵之爲驃騎長史世子景粹爲中軍將軍州別  
駕范義爲中軍長史其餘府州文武皆加秩尚書右  
僕射劉遵考子琨之爲誕司空主簿誕進琨之中兵  
參軍辭曰忠孝不得並琨之老父在不敢承命誕囚  
之十餘日終不受乃殺之先是右衛將軍垣護之左  
軍將軍崔道固屯騎校尉龐孟虬太子旅賁中郎將  
殷孝祖伐魏還至廣陵帝並使受慶之節度誕遣間  
使邀故佐司州刺史劉季之季之先與宗慤有隙慤  
都督司州季之委官閒道欲歸朝廷會誕反盱眙太

守鄭瑗以季之素爲誕所遇疑其同逆因邀道殺之  
送首於劉道隆慶之以示誕季之齒缺垣護之亦缺  
誕謂衆曰此垣護之頭非劉季之也誕幢主公孫安  
期率兵隊出降王璵之賞募數百人從東門出攻龍  
驤將軍程天祚營斷其弩弦天祚擊破之即走還城  
誕又加申靈賜南徐州刺史軍主馬元子踰城降追  
及殺之於城內立壇誓衆誕將歃血其所署輔國將  
軍孟玉秀曰陛下親歃羣臣皆稱萬歲慶之進營洛  
橋西焚其東門值雨不克慶之塞塹造攻道立行樓  
土山并諸攻具每攻城輒身先士卒帝戒之曰卿爲

統任當令處分有方何蒙楯城下身受矢石邪脫有  
傷挫爲損不少誕餉慶之食提挈者百餘人出北門  
慶之不問悉焚之誕於城上函表倩慶之爲送慶之  
曰我奉詔討賊不得爲汝送表汝必欲歸死朝廷自  
應開門遣使吾爲汝護送之誕所署平南將軍虞季  
克又出降帝使慶之於桑里置烽火三所克外城舉  
一烽克內城舉兩烽禽誕舉三烽誕遣千餘人自北  
門攻強弩將軍苟思達營龍驤將軍宗越擊破之又  
開東門掩攻劉道隆營復爲殷孝祖及負外散騎侍  
郎沈攸之所破誕又加申靈賜左長史王璵之右長

史范義左司馬左將軍孟玉秀右司馬右將軍璵之  
五子悉在建業璵之乘城慶之縛其五子示而招之  
許以富貴璵之曰吾受王厚恩不可以二心三十之  
年未護死所耳安可以私親誘之五子號叫於外呼  
其父及城平慶之悉撲殺之五月丁亥有流星大如  
斗杵尾長十餘丈從西北來墜城內是謂天狗占曰  
天狗所墜下有伏尸流血誕遣一百人出東門攻劉  
道隆營別遣疑兵一百人出北門沈攸之於東門奮  
短兵接戰大破之出北門者又爲荀思達所破誕又  
遣數百人出東門攻寧朔司馬劉劭營攸之又破之

彭城邵領宗在城內陰結死士襲誕先欲布誠於慶  
之乃說誕求爲閒諜領宗出致誠畢復還事泄誕鞭  
領宗二百考問不服遂支解之帝遣送章二紐其一  
曰竟陵縣開國侯食邑一千戶募賞禽誕其二曰建  
興縣開國男三百戶募賞先登又遣屯騎校尉譚金  
前虎賁中郎將鄭景元率羽林兵隸慶之誕復遣三  
百人出南門攻劉劭土山爲劭所破時夏雨不得攻  
城帝使御史中丞庾徽之奏免慶之官以激之詔無  
所問璽書督催前後相繼及晴帝怒使太吏擇發日  
將自濟江太宰江夏王義恭上表諫曰誕素無才略

蓄養又寡自拒王命士庶離散城內乏糧器械不足  
徒賴免兵倉頭三四百人造次相附恩怨夙結臣始  
短慮謂一旬可殄而假息流遷七十餘日上將受律  
羣藩岳峙銳卒精旅動以萬計大威所震未有成功  
臣雖凡怯猶懷憤踊陛下入翦封豕出討長蛇兵不  
血刃再興七百而蕞爾小醜遂延晷漏致皇赫斯怒  
將動乘輿此實臣下素食駑鈍之責行留百司莫不  
仰慙俯愧今盛暑被甲日費千金天威一麾孰不幸  
甚臣伏尋晉文王征淮南淹師出二百日方能制寇  
今誕餼糧垂竭背逆者多慶之等轉悟持重之非漸

見乘機之利且成旨頻降必應旦夕夷殄愚又以廣  
陵塗近人信易達雖阻江水約示不難且覩理者寡  
閹塞者衆忽見雲旗移次京都旣當祇悚四方之志  
必有未達臣愚伏重思計今寧不當計小醜省生命  
以安遐邇之情又以長江險濶風波難期王者尚不  
乘危況乃汎不測之水昔魏文濟江遂有遺州之名  
今雖先天不違動干休慶龍舟所幸理必利涉然居  
安慮危不可不懼私誠款款冒啟赤心帝乃止七月  
己巳衆軍攻克外城乘勝進克小城誕聞軍入與申  
靈賜走趨後園隊主沈允之義征客周滿胡思祖馳

至誕執玉鐶刀與左右數人散走允之等追及誕於橋上誕舉刀自衛允之傷誕面因墜水引出殺之傳首京邑時年二十七因葬廣陵貶姓留氏母殷妻徐並自殺追贈殷長寧園淑妃同黨皆伏法初誕使黃門呂曇濟與左右素所信者將世子景粹藏於民間謂曰事若不濟思相全脫如其不免可深埋之分以金寶齎送出門並各散走唯曇濟不去攜負景粹十餘日爲沈慶之捕得殺之詔城內士民無大小悉殺之慶之請自五尺以下全之其餘男子皆死以女口爲軍賞長水校尉宗越受旨行誅躬臨其事皆先刳

腸抉眼或笞面鞭腹苦酒灌創然後斬之越對之欣然若有所得所殺凡數千人聚人頭於石頭南岸謂之髑髏山給事黃門侍郎蔡興宗奉旨慰勞興宗與范義素善躬自收殮致喪還豫章舊墓帝聞之甚不悅詔自沈慶之以下封賞有差擢梁曠後將軍贈賀弼車騎將軍山陽海陵二郡太守長史如故贈劉琨之黃門郎詔吏部尚書謝莊爲之誄誕爲南徐州刺史在京口夜大風飛落屋瓦城門鹿牀倒覆及鎮廣陵入城衝風暴起揚塵晝晦又中夜閒坐有赤光照室見者莫不怪愕左右侍直眠中夢人告之曰官

須髮爲鞘既覺已失髻矣如此者數十人廣陵城舊不開南門云不利其主至誕乃開焉治城時誕循行有人干輿揚聲大罵曰大兵尋至何以辛苦百姓誕執之問其本末荅曰姓夷名孫家在海陵天公去年與道佛共議欲除此閒民人道佛苦諫得止大禍將至何不立六慎門誕問六慎門云何荅曰古時有言禍不入六慎門誕以其言狂悖殺之又五音士忽狂易見鬼驚怖啼哭曰外軍圍城城上張白布帆誕執錄二十餘日乃赦之城陷之日雲霧晦暝白虹臨北門亘屬城內自後廣陵每風晨雨夜有號哭之聲

當時謂之蕪城丙戌慶之進司空刺史如故四年八月己酉晉安王子勛都督南兖州徐州之東海諸軍事征虜將軍南兖州刺史以吳郡張岱爲諮議參軍行府州事尋領廣陵太守是年州境大水五年張岱遷南徐州別駕侍中沈懷文出爲征虜長史輔國將軍廣陵太守四月戊戌詔南徐兖二州逋租未入者可申至秋登丙午雍州刺史海陵王休茂殺司馬庾深之典籤楊慶戴雙舉兵反參軍尹元慶討斬之國除六月壬子分廣陵置沛郡省東平郡并廣陵六年二月沈懷文爲有司所糾免官禁錮侍中前軍將軍

謝莊爲征虜長史冠軍將軍廣陵太守四月庚申原  
除南兖州大明三年以前逋租十一月授侍中驃騎  
將軍柳元景南兖州刺史留衛京師七年正月庚寅  
子勛改江州刺史二月甲寅車駕巡南兖州八年閏  
五月前廢帝即位丹楊尹永嘉王子仁爲左將軍南  
兖州刺史右衛將軍度支尚書王琨爲左軍長史加  
輔國將軍廣陵太守時義陽王昶爲征北將軍徐州  
刺史道經廣陵上表曰竊聞淮南中霧眷求遺緒楚  
英流殛愛存邱墓並難結兩臣義開二主法雖事斷  
禮或情申伏見故賊留誕稱戎犯節自貽逆命膏斧

嬰戮在憲已彰但尋屬忝皇枝位叨列辟一以罪終  
魂骸莫赦生均宗籍死同匹豎旅寔委雜封樹不修  
今歲月愈邁愆流釁往踐境興懷感事傷目陛下繼  
明升運咸與維新大德方臨哀矜未及夫樂布哭市  
義犯雷霆田叔鉗赭志於夷戮況在天倫何獨無感  
伏願稽若前準降申丹志乞薄改楩柎微表窳窳則  
朽骨知榮窮泉識荷臨紙哽動辭不自宣詔曰征北  
表如此省以慨然誕及妻女並可以庶人禮葬并置  
守衛景和元年九月庚子子仁遷南徐州刺史丹楊  
尹征虜將軍始安王子真爲南兖州刺史王琨復爲



征虜長史將軍太守如故戊午車駕幸瓜步明帝泰  
始二年正月甲午子真遷左將軍丹楊尹青州刺史  
宗室劉祗爲南兖州刺史徐州刺史薛安都據彭城  
應晉安王子勛安都從子索兒自建康攜安都諸子  
及家累席卷北奔安都遣數百人至瓜步迎接及索  
兒渡淮南侵三月丙申帝遣使持節都督南徐徐南  
兖兖四州諸軍鎮北將軍南徐州刺史桂陽王休範  
進據廣陵督北討諸軍事辛亥加領南兖州刺史祗  
遷都官尚書七月己丑休範進征北大將軍以太尉  
長史沈文季爲寧朔將軍征北司馬廣陵太守休範

尋加散騎常侍還京口辛卯鎮軍將軍徐州刺史張  
永改南兖州刺史辛亥永復領徐州刺史九月庚戌  
太子左衛率建平王景素加給事中冠軍將軍南兖  
州刺史十月乙卯詔以鎮北咨議參軍路休之舍人  
嚴龍將謀竊發劉祗在藩規相應援通言北寇引令  
過淮頃休範濟江潛欲拒捍付有司行刑祗義欣之  
子也奉朝請江淹孤貧好學隨景素在鎮廣陵令郭  
彥文得罪辭連淹言淹受金繫州獄淹自獄中上書  
曰昔者賤臣叩心飛霜擊於燕地庶女告天振風襲  
於齊臺下官每讀其書未嘗不廢卷流涕何者士有

廣四  
一定之論女有不易之行信而見疑貞而爲戮是以  
壯夫義士伏死而不顧者此也下官聞仁不可恃善  
不可依始謂徒語乃今知之伏願大王暫停左右少  
加憐鑒下官本蓬戶桑樞之民布衣韋帶之士退不  
飾詩書以驚愚進不買名聲於天下日者謬得升降  
承明之闕出入金華之殿何嘗不局影凝嚴側身局  
禁者乎竊慕大王之義爲門下之賓備鳴盜淺術之  
餘豫三五賤伎之末大王厚以恩光眄以顏色實佩  
荆卿黃金之賜竊感豫讓國士之分矣常欲結纓伏  
劔少謝萬一剖心摩踵以報所天不圖小人固陋坐

貽謗缺迹墜昭憲身限幽圜履影弔心酸鼻痛骨下  
官聞虧名爲辱虧形次之是以每一念來忽若有遺  
加以涉旬月迫季秋天光沈陰左右無色身非木石  
與獄吏爲伍此少卿所以仰天槌心泣盡而繼之以  
血者也下官雖乏鄉曲之譽然嘗聞君子之行矣其  
上則隱於簾肆之間臥於巖石之下次則結綬金馬  
之庭高議雲臺之上次則虜南越之君繫單于之頸  
俱啟丹冊並圖青史寧當爭分寸之末競刀錐之利  
哉然下官聞積毀銷金積讒摩骨古則直生取疑於  
盜金近則伯魚被名於不義彼之二才猶或如此況

廣四  
廿

在下官焉能自免昔上將之恥絳侯幽獄名臣之羞  
史遷下室如下官當何言哉夫魯連之智辭祿而不  
反接輿之賢行歌而忘歸子陵閉關於東越仲蔚杜  
門於西秦亦良可知也若使下官事非其虛罪得其  
實亦當鉗口吞舌伏匕首以殞身何以見齊魯竒節  
之人燕趙悲歌之士乎方今聖歷欽明天下樂業青  
雲浮雒榮光塞河西洎臨洮狄道北距飛狐陽原莫  
不浸仁沐義照景飲醴而下官抱痛園門含憤獄戶  
一物之微有足悲者仰惟大王少垂明白則梧邱之  
魂不愧於沈首鵠亭之鬼無恨於灰骨不任肝膽之

切敬因執事以聞此心既照死且不朽景素覽書即  
日出之三年八月壬寅以中領軍沈攸之行南兖州  
刺史四年五月癸亥湘州刺史宗室劉韞爲南兖州  
刺史七月庚申假冠軍將軍持節都督北討前鋒諸  
軍事蕭道成爲督南兖徐二州諸軍事南兖州刺史  
持節假冠軍督北討如故宄從僕射李安民遷寧朔  
將軍冠軍司馬廣陵太守行南兖州事道成在淮安  
民遙相結事帝深以爲疑徙安民爲劉韞冠軍司馬  
寧遠將軍京兆太守是年詔更改葬故竟陵王誕祭  
以少牢五年道成進督兖青冀三州六年道成爲帝

所疑徵爲黃門侍郎領越騎校尉道成深爲憂慮廣陵人荀伯玉勸遣數十騎入魏界安置標榜於是魏游騎數百履行界上道成以聞復授冠軍將軍留本任遷鎮淮陰九月侍中中領軍劉劭爲使持節都督南兖徐兖青冀五州諸軍事平北將軍出鎮廣陵劭固辭侍中軍號許之乙丑以爲假平北將軍七年四月甲辰於南兖州置新平郡七月道成徵還京師遷散騎常侍太子左衛率戊寅寧朔將軍沈懷明爲南兖州刺史劉劭解都督假號并節秦豫元年於海陵郡置臨澤縣時屯騎校尉劉善明爲海陵太守郡境

邊海無樹木善明課民種榆櫟雜果遂獲其利蒼梧王元徽二年正月庚子以右光祿大夫張永爲征北將軍南兖州刺史六月庚子平南將軍蕭道成遷散騎常侍中領軍都督南兖徐兖青冀五州軍事鎮軍將軍南兖州刺史持節如故留衛建康前湘州長史正負郎右軍將軍江謐爲鎮軍長史廣陵太守荀伯玉爲鎮軍中兵參軍帶廣陵令初道成在淮南伯玉假還廣陵夢上廣陵城南樓上有二青衣小兒語伯玉云草中肅九五相追逐伯玉視城下人頭上皆有草泰始七年伯玉又夢道成乘舩在廣陵北渚道成

兩腋下有翅不舒伯玉問何當舒曰却後三年伯玉  
夢中自謂是呪師向道成唾呪之凡六呪有六龍出  
兩腋下翅皆舒還而復斂五年廢蒼梧王道成謂伯  
玉曰卿時乘之夢今且效矣順帝昇明元年七月丙  
午司空南兖州刺史蕭道成改領南徐州刺史東中  
郎司馬行會稽郡事李安民爲使持節督北討軍事  
冠軍將軍南兖州刺史二年二月辛卯安民遷郢州  
刺史郢州刺史新除鎮南將軍黃回不樂停郢州固  
求南兖遂率部曲輒還改都督南兖徐兗青冀五州  
諸軍事鎮北將軍南兖州刺史加散騎常侍持節如

故回先與司徒袁粲謀誅道成至是道成欲殺回回  
時將之鎮部曲數千人不敢顯然收之四月辛卯乃  
召入東府停外齋使寧朔將軍桓康將數十人數回  
罪然後殺之甲午輔國將軍淮南宣城二郡太守蕭  
映爲假節都督南兖兗徐青冀五州諸軍事行南兖  
州刺史將軍如故映道成第三子也九月戊申行南  
南兖州刺史蕭映爲南兖州刺史加冠軍將軍假節  
都督復爲監軍督五州如故三年三月甲辰太傅蕭  
道成爲相國封齊公建國欲置齊郡於京邑議者以  
江右土沃流民所歸乃治瓜步以步兵校尉劉懷慰

爲輔國將軍齊郡太守四月壬申進齊公爵爲王又以南兗州之廣陵海陵等十郡增封甲午齊王蕭道成自立爲帝以帝爲汝陰王是時南兗州領郡十一廣陵海陵山陽盱眙秦南沛新平北淮北濟陰北下邳東莞縣四十四廣陵郡領廣陵海陵高郵江都四縣戶七千七百四十四口四萬五千六百一十三

廣陵通典卷四

廣陵通典卷五

江都汪中撰

齊高帝建元元年四月甲午即位以齊國中領軍王敬則爲使持節散騎常侍都督南兗兗徐青冀五州軍事平北將軍南兗州刺史六月甲申立皇子鑑爲廣陵王二年正月敬則進號安北將軍魏兵侵淮泗敬則恐委鎮還都百姓皆驚散奔走帝以其功臣不問除都官尚書撫軍將軍遣左民尚書王元載領廣陵太守加平北將軍假節行南兗州事三月戊戌護軍將軍陳顯達爲使持節散騎常侍都督南兗兗徐

青冀五州諸軍事平北將軍南兖州刺史之鎮魏師  
退帝敕顯達曰虜經破散後當無復犯關理但國家  
邊防自應過存備豫宋元嘉二十七年後江夏王作  
南兖徙鎮盱眙沈司空亦以孝建初鎮彼政當以淮  
上要於廣陵耳卿謂前代此處分云何今僉議皆云  
卿應據彼地吾未能決乃當以擾動文武爲勞若是  
公計不得憚之事竟不行三年正月丙子遷益州刺  
史貞陽公柳世隆爲使持節督南兖兖徐青冀五州  
軍事安北將軍南兖州刺史江北畏魏人騷動不安  
帝敕世隆曰比有北信賊猶治兵在彭城年已垂盡

或當未必送死然豺狼不可以理推爲備或不可懈  
彼郭旣無關要用宜開除使去金城三十丈政佳耳  
發民治之無嫌若作三千人食者已有幾米可指牒  
付信還民間若有丁多而細口少者悉令戍非疑也  
又敕曰昨夜得北使啟鍾離聞賊已渡淮旣審送死  
便當制加剿撲卿好參候之有急令諸小戍還鎮不  
可賊至不覺也賊已過淮不容爾退散要應有處送  
死者定攻壽陽吾當遣援軍也又遣軍助世隆并給  
軍糧魏師退帝欲土斷江北又敕世隆曰呂安國近  
在西土斷郢司二境上雜民大佳民殆無驚恐近又

令垣豫州斷其州內適得崇祖啟事已行竟近無云  
云殊稱前代舊意卿視兗部中可行此事不若無所  
擾春便就手也四年三月世祖即位加散騎常侍世  
隆善卜別龜甲價至一萬永明建號世隆題州齋屏  
曰永明十一年謂典籤李黨曰我不見也世隆於永  
明九年卒而世祖在位十一年皆如其言永明元年  
世隆奏尚書符下土斷條格并省僑郡縣凡諸流寓  
本無定憩十家五落各自星處一縣之民散在州境  
西至淮畔東屆海隅今專罷僑邦不省荒邑雜居舛  
止與先不異難爲區斷無革游濫謂應同省隨界并

帖若鄉屯里聚二三百家井甸可修區域易分者別  
詳立於是濟陰郡六縣下邳郡四縣淮陽郡三縣東  
莞郡四縣以散居無實土官長無廨舍寄止民村及  
州治立見省民戶帖屬由是四郡皆并廣陵世隆尋  
入爲侍中護軍將軍正月壬子鎮北將軍竟陵王子  
良爲侍中使持節都督南兗兗徐青冀五州諸軍事  
征北將軍南兗州刺史給油絡車是年於廣陵郡置  
齊寧縣於海陵郡置齊昌縣二年春正月乙亥子良  
入爲護軍將軍兼司徒司州刺史呂安國爲都督南  
兗兗徐青冀五州諸軍事平北將軍南兗州刺史尋



徙都督湘州刺史三月乙亥吳興太守張岱爲使持  
節監南兖兖徐青冀五州諸軍事後將軍南兖州刺  
史未拜卒四月甲辰詔揚南徐南兖徐兖五州統內  
諸獄囚並部送還臺斷枉直六月乙巳安陸王子敬  
爲持節監南兖兖徐青冀五州諸軍事北中郎將南  
兖州刺史征虜將軍王廣之爲北中郎司馬廣陵太  
守將軍如故四年子敬進號右將軍五年正月戊子  
徙荊州刺史征虜將軍南豫州刺史晉安王子懋爲  
使持節監南兖兖徐青冀五州軍事後將軍南兖州  
刺史冠軍長史行南豫州事沈憲爲後軍長史廣陵

太守是年罷新平郡并海安度屬海陵郡六年十一  
月庚申子懋徙湘州刺史西陽王子明爲持節都督  
南兖兖徐青冀五州軍事冠軍將軍南兖州刺史沈  
憲仍留爲冠軍長史太守如故頻行州府事八年典  
籤劉道濟取府州五十人役自給又役子明左右及  
船仗贓私百萬爲有司所奏帝怒賜道濟死沈憲坐  
不糾免官長沙內史劉季連爲冠軍長史廣陵太守  
行府州事尋入爲給事黃門侍郎太子左率曹虎轉  
冠軍司馬廣陵太守帝敕虎曰廣陵須心腹非吾意  
可委者不可得處此任八月曹虎遷鎮西司馬南平

內史子明進號征虜將軍冠軍將軍王湛爲征虜長  
史行南兖州府州事九年卒蕭惠朗爲征虜長史行  
南兖州事典籤何益孫賊罪百萬棄市惠朗坐免官  
十年子明進左將軍遷會稽太守正月戊午北中郎  
將南海王子罕爲持節都督南兖兗徐青冀五州軍  
事征虜將軍南兖州刺史顧憲之爲長史行南兖州  
事十一年鬱林王即位進號後將軍隆昌元年遷散  
騎常侍右衛將軍正月丁未車騎將軍丹陽尹安陸  
王子敬遷使持節都督南兖兗徐青冀五州征北大  
將軍南兖州刺史海陵王延興元年加侍中時西昌

侯蕭鸞將謀篡竊賊虐諸王九月癸未遣平西將軍  
王廣之害子敬於廣陵永明末有虜入廣陵城投井  
而死又有象至廣陵此其應也時子敬頗持兵自衛  
廣之至歐陽遣左右陳伯之先驅因城開獨入斬子  
敬時年二十三十月癸巳詔以廣陵年常遞出千人  
以助淮戍勞擾爲煩今可長停辛亥宣城王鸞以皇  
太后令廢帝爲海陵王尋被弒明帝建武元年十月  
癸亥即位中護軍王元邈遷持節都督南兖兗徐青  
冀五州諸軍事平北將軍南兖州刺史射聲校尉裴  
昭明爲平北長史廣陵太守帝以其在事無所啟奏

代還責之昭明日臣不欲競執關鍵故耳二年魏人寇邊詔以右將軍張瓌假節督廣陵諸軍事行南兖州事寇退乃還三月己未詔雍豫司南兖徐五州遇寇之家悉停今年稅調其與虜交通不問往罪八月丁未右衛將軍廬陵王寶源爲使持節都督南兖兖徐青冀五州軍事後將軍南兖州刺史衛尉蕭穎胄爲後軍長史冠軍將軍廣陵太守行南兖州府州事是年魏人揚聲當飲馬長江帝懼敕穎胄移居民入城百姓驚恐席卷欲南渡穎胄以賊勢尚遠不即施行魏兵竟不至永泰元年五月乙酉寶源徙會稽太

守穎胄遷持節督南兖兖徐青冀五州諸軍事輔國將軍南兖州刺史東昏侯永元元年二月癸丑北中郎將邵陵王寶攸爲持節都督南北徐南兖青冀五州軍事南兖州刺史未拜遷征虜將軍領石頭戍事九月丁未徙豫州刺史裴叔業督南兖兖徐青冀五州軍事南兖州刺史叔業見時方亂不樂居近藩朝廷許停本任二年正月壬子輔國將軍張沖遷使持節督南兖兖徐青冀五州諸軍事南兖州刺史不拜三月丁未又遷沖爲督南兖兖徐青冀五州南兖州刺史並未拜是時平西將軍崔慧景率軍水路征壽

春密有反謀與其子直閣將軍覺期慧景至廣陵覺便出奔慧景過廣陵數十里召會諸軍主曰吾荷三帝厚恩當顧託之重幼主昏狂朝廷壞亂危而不扶責在今日欲與諸君共建大功以安宗社何如衆皆響應於是回軍還廣陵司馬崔恭祖守廣陵城開門納之慧景停二日收衆濟江四月癸酉敗死六月戊戌守五兵尚書陸慧曉持節督南兖兗徐青冀五州軍事輔國將軍南兖州刺史時朝議又欲以爲侍中左僕射王亮曰濟河須人今且就朝廷借之以鎮南兖州右僕射王瑩吏部尚書王志皆曰侍中彌須英

華方鎮猶應有選者亮曰角其二者則貂璫緩拒寇切今朝廷甚弱宜從切者慧曉三子僚佐倕並有美名時人謂之三陸慧曉授兖州三子依次第各作一讓表辭並雅麗時人歎服慧曉至鎮俄以疾歸而卒十一月辛丑輔國將軍北徐州刺史張稷都督南兖州諸軍事南兖州刺史俄進督北徐兖青冀五州諸軍事將軍如故稷擢橫桑人張齊爲府中兵參軍三年十月京師告急徵稷爲侍中宿衛宮城帝遣軍主常僧景鎮廣陵李叔獻屯瓜步爲東北聲援十一月壬午征東將軍蕭衍遣使曉喻並率衆降乃以從祖

弟前步兵校尉蕭曷爲寧朔將軍行南兖州事鎮廣陵時天下未定江北僞楚各據塢壁曷示以威信渠帥相率面縛請罪境內皆平和帝中興二年正月己亥遷督南兖州諸軍事輔國將軍監南兖州三月丙辰帝禪位四月丙寅梁王蕭衍自立爲帝丁卯奉帝爲巴陵王梁武帝天監元年封曷吳平縣侯食邑一千戶仍爲使持節都督北兖徐青冀四州諸軍事冠軍將軍南兖州刺史詔曷母毛氏爲國太夫人禮如王國太妃假金章紫綬曷居州清恪有威裁明解吏職文案無擁下不敢欺吏人畏敬屬州境年荒計口

賑卹爲饘粥於路以賦之死者給棺具人甚賴焉四年伐魏曷帥衆出淮陽進屠宿豫丁母憂詔起攝職五年班師除太子右衛率廬江太守河東裴邃遷廣陵太守與鄉人共入魏武廟因論帝王功業其妻甥王篆之密啟云裴邃多大言有不臣之迹左遷始安太守六年九月丙戌左衛將軍呂僧珍爲使持節平北將軍南兖州刺史僧珍東平范人也世居廣陵是時以去家久表求拜墓帝欲榮之使爲本州僧珍在任見士大夫迎送過禮平心率下不私親戚兄弟在外堂並不得坐指客位謂曰此兖州刺史座非呂僧

珍牀及別室促膝如故從父兄子宏以販葱爲業僧  
珍旣至棄業欲求州官僧珍曰吾荷國重恩無以報  
効汝等自有常分豈可妄求叨越但當速反葱肆耳  
僧珍舊宅在市北前有督郵廨鄉人咸勸徙廨以益  
其宅僧珍怒曰督郵官廨也置立以來便在此地豈  
可徙之益吾私宅姊適于氏住市西小屋臨路與列  
肆雜處僧珍常導從鹵簿到其宅不以為耻七年二  
月乙亥徵爲領軍將軍軍師將軍昌義之督南兖兖  
徐青冀五州諸軍事輔國將軍南兖州刺史坐禁物  
出藩爲有司所奏免丙子中護軍長沙王淵業爲使

持節都督南兖兖徐青冀五州諸軍事仁威將軍南  
兖州刺史運私邸米餽人作甃以砌城帝善之八年  
十月乙巳徵爲護軍將軍中軍將軍始興王憺爲使  
持節散騎常侍都督南北兖徐青冀五州諸軍事鎮  
北將軍南兖州刺史九年正月乙亥遷益州刺史丙  
子雲麾將軍晉安王綱爲使持節都督南北兖徐青  
冀五州諸軍事宣毅將軍南兖州刺史黃門侍郎庾  
於陵爲長史廣陵太守行府州事記室張率轉宣毅  
諮議參軍仍兼記室十年是後州郡縣多所析置高  
郵置竹塘三歸二縣及置廣業郡尋以有嘉禾爲神

農郡十二年晉安王入爲宣惠將軍丹陽尹張率除  
中書侍郎吳平侯昺復爲使持節督南北兗北徐青  
冀五州諸軍事信威將軍南兗州刺史十三年六月  
己亥徵爲領軍將軍輕車將軍蕭昂監南兗州初兄  
昺再爲南兗德惠在人及昂來代時人方之馮氏徵  
仁威將軍雍州刺史蕭淵藻爲使持節都督南兗兗  
徐青冀五州諸軍事南兗州刺史軍號如故十七年  
二月乙卯宣毅將軍領石頭戍事南康王績爲使持  
節都督南北兗徐青冀五州諸軍事南兗州刺史少  
府卿江革爲長史貞威將軍廣陵太守績在州著稱

尋有詔徵還民曹嘉樂等三百七十人詣闕上表稱  
績尤異一十五條乞留州任優詔許之進號北中郎  
將普通四年徵爲侍中三月壬寅鎮右將軍豫章王  
綜爲使持節都督南兗兗徐青冀五州諸軍事平北  
將軍南兗州刺史給鼓吹一部江革長史將軍太守  
如故五年進號鎮北將軍綜旣自疑爲齊東昏子恒  
有叛志在州頗勤於事而不見賓客其詞訟則隔簾  
理之方幅出行垂帷於輿每云惡人識其面也初齊  
故建安王寶寅在魏綜求得北來道人釋法鸞使入  
魏通問於寶寅謂爲叔父許舉鎮歸之襄陽人梁話

母死法鸞說綜厚賜之言終可任使綜遺話錢五萬  
及葬畢引在左右法鸞在廣陵往來通魏尤數每舍  
淮陰苗文寵家薦文寵爲綜國常侍六年大舉北伐  
詔綜與諸將繼進信威將軍邵陵王綸以西中郎將  
權攝南兖州魏將元法僧以彭城降三月己酉帝令  
綜都督衆軍鎮彭城六月庚辰遂與梁話苗文寵奔  
魏江革及司馬祖暉之皆爲魏所執十二月戊子邵  
陵王綸有罪免官中大通三年九月庚午太子詹事  
蕭淵藻爲征北將軍南兖州刺史四年正月丙寅封  
臨川王宏子正德爲臨賀王尋出爲南兖州在任苛

刻民不堪命廣陵沃土遂爲之荒至人相食噉大同  
三年九月南兖州大饑四年八月甲辰詔南兖等十  
二州旣經饑饉曲赦逋租宿債勿收今年三調太清  
元年使持節都督南北兖北徐青冀東徐譙七州諸  
軍事平北將軍南兖州刺史南康嗣王會理督衆軍  
北討尋詔歸本鎮二年侯景圍京師會理治嚴將入  
援會理弟建安侯通理性慷慨慕立功名博覽多識  
有文才嘗祭孔文舉墓并爲立碑製文甚美至是聚  
賓客數百輕裝詣南兖州隨會理赴難時北徐州刺  
史封山侯正表鎮鍾離帝召之入援正表將應其兄



正德託以舩糧未集不進景以正表爲南兗州刺史封南郡王正表乃於歐陽立柵以斷援軍帥衆一萬聲言入援實欲襲廣陵密書誘廣陵令劉詢使燒城爲應詢以告會理十二月會理使詢帥步騎千人夜襲正表大破之正表走還鍾離詢收其兵糧歸就會理與之入援通理恒身當矢石爲士卒先三年二月侯景上表乞和庚子會理與前青冀二州刺史湘潭侯退西昌侯世子或衆合二萬至琅邪景慮其自白下而上啟云請北軍聚還南岸不爾妨臣濟江太子即勒會理自白下城移軍江潭苑三月丁卯宮城陷

會理還鎮通理因入齊爲質乞師行二日景遣前臨江太守董紹先爲江北行臺齊帝手敕召會理壬午紹先至廣陵衆不滿二百皆積日饑疲會理士馬甚盛僚佐說會理曰景已陷京邑欲先除諸藩然後篡位若四方拒絕立當潰敗柰何委全州之地以資寇手不如殺紹先發兵固守與魏連和以待其變會理素懦乃用其典籤范子鸞計曰天子年尊受制賊虜今有手敕召我入朝臣子之心豈得違背且遠處江北功業難成不若身赴京都圖之肘腋遂以城授紹先紹先入以烏幡麾衆衆莫敢動悉收廣陵文武部

曲鎧仗金帛追獲通理防嚴不得與會理相見通理  
乃僞請先還都入辭母因謂其姊固安主曰兄若至  
願使善爲計自勉勿以爲念前路亦思立效但未知  
天命何如耳紹先遣會理單馬還建康景以紹先爲  
南兖州刺史大寶元年正月廣陵人來疑說前廣陵  
太守祖皓曰董紹先輕而無謀人情不附襲而殺之  
此壯士之任也今欲糾率義勇奉戴府君若其克捷  
可立桓文之勲必天未悔禍猶足爲梁室忠臣皓曰  
此僕所願也乃相與糾合勇士得百餘人癸酉襲斬  
紹先據城馳檄遠近推前太子舍人蕭勔爲刺史仍

結束魏爲援乙亥景遣其黨郭元建帥衆奄至皓嬰  
城固守二月景又遣侯子鑿率舟師八千自率徒兵  
一萬來攻三日癸未城破執皓縛而射之箭徧體然  
後車裂以徇城中無少長皆埋之於地馳馬射而殺  
之死者八千人以子鑿監南兖州事景還建康五月  
丁巳景以子鑿爲南兖州刺史子鑿獲白獐獻之未  
幾景召子鑿還以江北行臺太尉郭元建爲南兖州  
刺史行臺如故三年三月丁亥征東大將軍王僧辨  
平建康庚寅景南兖州刺史郭元建等並以城降僧  
辨僧辨遣東揚州刺史領會稽太守陳霸先將兵向

廣陵受降又遣使者往安慰之諸將多私使別索馬仗會侯子鑿渡江至廣陵謂元建等曰我曹梁之深讎何顏復見其主不若投北可得還鄉衆皆以爲然先是魏靜帝武定八年以東南道行臺尚書辛術爲東徐州刺史經略江淮鎮下邳侯景之亂術招攜安撫城鎮相繼款附前後二十餘州威惠大著至是元建等遣使詣術請降霸先至歐陽術已入據廣陵廣陵由是入齊霸先收元建部曲三千餘人而還前廣陵太守謝哲寓居廣陵亦從霸先渡江侯景之敗也以傳國璽自隨使其侍中兼平原太守趙思賢掌之

曰若我死宜沈於江勿令吳兒復得之思賢自京口濟江遇盜從者棄之草閒至廣陵以告元建元建取之以與辛術此璽即秦所制方四寸上紐交盤龍其文曰受命于天旣壽永昌文宣帝天保三年四月壬申術送璽至鄴詔改南兖州爲東廣州於廣陵置廣陵江陽二郡帝使大都督潘樂與郭元建將兵五萬攻陽平拔之五月圍梁秦郡辛術諫曰朝廷與湘東王信使不絕陽平侯景之土取之可也今王僧辨已遣嚴超達守秦郡於義何得復爭之且水潦方降不如班師弗從陳霸先命別將徐度引兵助秦郡固守

齊衆七萬攻之甚急王僧辨使左衛將軍杜崩救之  
霸先亦自歐陽來會與元建大戰於士林霸先縱強  
弩射元建衆却崩因縱兵元建大敗士卒死者萬餘  
人被虜者千餘人元建收餘衆去術尋徵爲殿中尚  
書領太常卿術清儉寡欲性愛文史自定淮南凡諸  
資物一毫無犯惟大收典籍多是宋齊梁時佳本鳩  
集萬卷并顧陸之徒名畫二王以下法書俱不上王  
府惟入私門及還朝頗以饋遺權要物議以此少之  
時政煩賦重江北之民不樂屬齊其豪傑數請兵於  
梁司徒王僧辨僧辨以通好不許七月廣陵僑人朱

盛張象等潛聚黨數千人謀襲殺刺史温仲邕遣使  
詣京口求援於陳霸先云已克其外城霸先使告僧  
辨僧辨曰人之情僞未易可測若審克外城亟須應  
援如其不爾無煩進軍使未報霸先已濟江僧辨乃  
命武州刺史杜崩等助之會盛等謀泄霸先因進軍  
圍廣陵九月帝遣使告梁王僧辨陳霸先曰請釋廣  
陵之圍必歸廣陵歷陽兩城霸先引兵還京口江北  
之民從霸先濟者萬餘口帝卒不以兩城與梁四年  
十二月宿預民東方白額以城叛降梁江西州郡皆  
起兵應之五年正月梁征北大將軍南徐州刺史陳

霸先自丹徒濟江圍廣陵帝徵冀州刺史段韶討白  
額東廣州刺史王敬寶遣使詣韶告急六月韶趣廣  
陵霸先解圍走韶追至揚子柵乃還大獲其軍資器  
物七年五月東廣州刺史王敬寶率兵屬大都督蕭  
軌攻建康六月甲辰潛至鍾山與梁南徐州刺史侯  
安都戰於龍尾殺其軍主張纂乙卯師大潰敬寶被  
擒而死九年五月癸丑廣陵南城主張顯和長史張  
僧那各率所部叛降於陳後主武平四年陳以鎮前  
將軍吳明徹爲大都督來寇淮南州郡多破五月癸  
巳陷瓜步胡墅二城八月壬子陳戎昭將軍徐敬辨

陷海安九月甲子陳師陷陽平丙子陳左衛將軍樊  
毅陷廣陵楚子城五年陳宣帝太建六年正月壬戌  
陳大赦新附諸州郡甲申廣陵金城降於陳陳復置  
南兖州八年八月丁卯車騎大將軍司空吳明徹爲  
都督南北兖南北青譙五州諸軍事南兖州刺史九  
年正月周滅齊帝將經略徐兖十月詔明徹督諸軍  
北侵以其世子戎昭將軍貞外散騎侍郎慧覺攝行  
州事十年二月甲子敗績於呂梁明徹及將卒以下  
並爲周軍所獲三月丁酉以侍中使持節都督水陸  
諸軍事中軍大將軍開府儀同三司護軍將軍淳于

量爲散騎常侍都督南北兗譙三州諸軍事車騎將  
軍南兗州刺史十一年正月丁酉龍見於南兗州永  
寧樓側池中九月乙卯周遣徐州總管韋孝寬爲行  
軍元帥徇地淮南十一月孝寬分遣徐州刺史梁士  
彥攻廣陵辛丑以南兗州刺史淳于量爲上流水軍  
都督以平北將軍沈恪假節監南兗州戊申士彥拔  
廣陵周靜帝大象元年以南兗州爲吳州置總管刺  
史並治廣陵十二月乙丑陳故南北兗晉三州及盱  
眙山陽陽平馬頭秦歷陽沛北譙南梁等九郡民並  
亡歸江南二年六月相州總管尉遲迴起兵討丞相

楊堅東廣州刺史于顛素與總管趙文表不協因是  
謀殺文表乃臥閤內詐得心疾謂左右曰我見兩三  
人至我前者輒大驚即欲斫之不能自制其有賓客  
候問者皆令去左右顛漸稱危篤文表往候之令從  
者至大門外而止文表獨至顛所顛歛然而起抽刀  
斫殺之因唱言曰文表與迴通謀其麾下無敢動者  
楊堅以迴未平慮顛復生邊患因而勞勉之即拜顛  
吳州總管陳將錢茂和率數千人襲江陽顛逆擊走  
之七月陳復遣將陳慧紀周羅暉燕合兒等襲顛顛  
拒之而退賜采數百段廣陵人杜喬生反刺史元義

討平之九月己酉廣陵義軍主曹藥以其衆降陳大  
定元年二月甲子隨王堅自立爲帝奉帝爲介公

廣陵通典卷五

